

Ingoa: _____ Rangi: ____/____/____

Ā te Wā

Nā Te Maari Gardiner

Whatukura

I te wā e tākaro ana a Toa mā me ā rātou kakau kōrari, ka mea atu te pāpā o Hau, “Haere, e tama. Whakapiri atu ki a rātou. Ā te wā, mā tō taiaha me tō whai atu i ngā tikanga a Tūmataunga, ka riro māu e tiaki te iwi.” Kāore ia e hiahia ki te mau rākau.

I te wā e tākaro ana a Toa mā me ā rātou kōpere kākaho pērā anō te kī a Pāpā. Kāore a Hau e hiahia ki te whiu kōpere. I te wā e mahi tītītōrea ana a Toa mā, me ā rātou tī mānuka, kāore ia e hiahia ki te mahi tītītōrea. Kāore a Hau e hiahia ki te whai i ngā mahi rēhia a Toa mā.

Ia rā ka kuhu kē ia ki Te Wao-nui-a-Tāne kia kite i tōna hoa ngahere, i a Rehu. I roto i te ngahere ka āta whakarongo a Hau rāua ko Rehu ki ngā rākau. Ka ako rāua i te tangi o ngā rākau, me ngā āhuatanga o ngā rākau ki te whāngai, ki te whakaora tinana hoki. Ko Te Wao-nui-a-Tāne te wāhi pārekareka rawa atu ki a Hau.

Nō tētahi wā, ka whārōrō a Toa. Auē ana, kapo ana i tōna puku. I tana taha he hua rākau, he waipō te tae. Mōhio mārika a Hau rāua ko Rehu me aha rāua. I kohi rauora a Hau, ka ngaungau, ka purua ki te waha o Toa. Ka kohi rimurimu a Rehu, ka whakamākū, ka whakatakoto ki te rae o Toa. Kātahi ka waiata rāua i ngā puoro o te ngahere. Nāwai rā, ka mutu te tāwheta me te auē a Toa. Ka warea e te moe.

I a ia i oho ake i mea atu a Hau, “E hika, kua ora anō koe. Me hoki tāua ki te kāinga.” Harikoa ana rātou ki te kite atu i a Toa rāua ko Hau e hoki ora mai ana. Ka kōrero a Toa mō ngā mahi a Hau rāua ko Rehu ki te whakaora i a ia, ā, ka mīharo te iwi. “Ā te wā ka riro māu e tiaki te iwi,” tā Pāpā.